

## Мученики Гурий, Самон и Авив

(память 15 ноября по старому стилю)



**В**о время гонений на христиан при императорах Диоклетиане (284-305) и Максимиане (305-311) в городе Едессе были схвачены два друга, христиане Гурий и Самон, проповедники Слова Божия.

На предложение принести жертву богам святые ответили решительным отказом, исповедав свою веру во Христа.

За это они подверглись страшным мучениям: их били, подвешивали за руки, привязав к ногам тяжелый груз, бросали в тесную темницу.

Мученики все переносили с твердостью и молитвой. Ночью мучеников отвезли за город и обезглавили. Христиане погребли их святые тела.

Через много лет последний император-язычник Ликиний (311-324) начал гонение на христиан.

Диакон Едесской церкви по имени Авив, которого император повелел схватить за ревностное распространение истинной веры, сам пришел к палачам, не желая, чтобы при его розыске пострадали другие христиане.

Святой исповедал веру во Христа и был приговорен к сожжению. Мученик сам пошел в огонь и с молитвой предал дух свой Господу. Когда огонь погас, мать святого и родственники обрели тело его неповрежденным. Мученика похоронили рядом со святыми Гурием и Самоном.

После смерти святых совершались многочисленные чудеса с теми, кто с верой и любовью призывал их себе на помощь. Так, однажды один воин-гот, посланный на службу в Едессу, взял в супруги благочестивую девушку Евфимию.

Перед этим он поклялся ее матери Софии у гробницы мучеников Гурия, Самона и Авива, что не сделает супруге никакого зла, никогда не оскорбит ее, но будет любить и почитать.

По окончании службы в Едессе он взял Евфимию с собой и возвратился на родину. Оказалось, что он обманул ее: на родине у него была жена. Евфимия стала его рабыней.

Много издевательств и унижений пришлось претерпеть Евфимии. Когда у нее родился ребенок, то ревнивая готчанка отравила его. Евфимия обратилась с молитвой к святым мученикам — свидетелям клятвы обманщика, и Господь избавил ее от страданий и чудодейственно перенес в Едессу, где она встретила мать.

Через некоторое время клятвopеступника вновь послали на службу в Едессу. Весь город узнал о его злодеянии, обличенном Софией, и по приказу правителя гот был казнен.

Святые мученики Гурий, Самон и Авив известны среди православных христиан как покровители супружества, брака, счастливой семьи, им молятся “аще муж безвинно возненавидит жену свою”.

В Москве в храме Иоанна Воина в Бабыгородском переулке, на Якиманке, есть придел этих святых.

## **Акафист святым мученикам Гүрию, Самону и Авиву**

### Кондак 1

Избранныи чудотворцы Христовы и святые веры исповедницы, Гурие, Самоне и Авиве добронравнии, память вашу чтуци песньми похвальными, воспеваем яко христиан заступников, страждущих покровителей. Вы же, имуще дерзновение ко Господу, от всяких бед и напастей свободите нас, верою и любовью зовущих: Радуйтесь, Гурие, Самоне и Авиве, страстотерпцы Христовы и обидимых покровителие!

### Икос 1

Ангелы во плоти Троице Святей равночисленнии, любовью к Богу горяще идолы попрасте, веру Христову укрепите, Троицу Святую прославите, темже убо похваляюще подвиги ваша, глаголем вам сице:

Радуйтесь, светильники благочестия. Радуйтесь, обличители нечестия. Радуйтесь, утверждения веры Христовой. Радуйтесь, столпы Церкви Божия. Радуйтесь, верных надежду и заступление. Радуйтесь, неверных страх и посрамление. Радуйтесь, Гурие, Самоне и Авиве, страстотерпцы Христовы и обидимых покровителие!

### Кондак 2

Видя нечестие людей града Эдеса, святии Гурий и Самон в пустыню удалишися, бегая князя мира сего и соблазнов и усердно служаще Богу, день и ночь воспеваху: Аллилуиа.

### Икос 2

Разум премудр имея, святии мученицы, выну трудишася во славу Божию, языческое нечестие обличая, ищущия истины на путь правый наставляя и мнози неверныя к Богу Истинному привлекоша, сего ради глаголем вам сице:

Радуйтесь, насадители истиннаго богопочитания. Радуйтесь, искоренители демонскаго служения. Радуйтесь, тьмы нечестия обличители. Радуйтесь, идольския прелести низложители. Радуйтесь, исповедницы Христовы изряднии. Радуйтесь, светила веры православней. Радуйтесь, Гурие, Самоне и Авиве, страстотерпцы Христовы и обидимых покровителие!

### Кондак 3

Силою свыше осененнии святии мученицы, гонителей святой веры неустрашишася, веления нечестиваго Антониана небрегоша и веру Христову велегласно прославиша, темже и в темницу ввержени пояху Богу: Аллилуиа.

### Икос 3

Имея веру во Христа адаманта твердейшую и силою тоя вооружившиися, мужественно претерпели есте, святии мученицы, темничные узы и самую смерть, сего ради похваляюще таковое мужество, ублажаем вас сице:

Радуйтесь, истинныя веры исповедницы. Радуйтесь, Царствия Божия наследницы. Радуйтесь, мучеников похвало. Радуйтесь, страстотерпцев славо. Радуйтесь, святые Церкви утверждение. Радуйтесь, всего рода христианскаго украшения. Радуйтесь, Гурие, Самоне и Авиве, страстотерпцы Христовы и обидимых покровителие!

### Кондак 4

Бурею помышлений сумнительных одержимый, нечестивый царь Ликийий воздвиже жестокое гонение на христианы, ты же, страстотерпче Авиве, того не убоясь, с твердою верою взывал еси Христу Богу: Аллилуиа.

#### Икос 4

Слышав царь Ликийский твои подвиги, досточудный Авиве, и твое твердое веры исповедание, разъярися на тя злобою, повеле предати тя смерти лютей яко противника царева, ты же, уведев о сем, добровольно потекл еси на мучение, и с радостью претерпел еси огненное сожжение, сего ради дивящися великому мужеству твоему, величаем тя сице:

Радуйся, поборниче веры во Христа неустрашимый. Радуйся, воине Христов непобедимый. Радуйся, повешанный на древе за Распростершаго руке Свои на древе крестнем. Радуйся, строганный когтыми железными. Радуйся, утешение подавая скорбящим. Радуйся, скорый помощниче всем за истину терпящим. Радуйтесь, Гурие, Самоне и Авиве, страстотерпцы Христовы и обидимых покровителие!

#### Кондак 5

Боготечным звездам на тверди небесней подобнии были есте, святии мученицы, лучами жития своею тьму языческаго нечестия просвещающии и многих на путь истинны наставляющии. Темже благоговейно чтуще память вашу, благодарно поем Богу: Аллилуиа.

#### Икос 5

Видеша людие града Эдеса многие чудеса, бываемыя от раки святых мучеников Гурия, Самона и Авива, зело радовахуся и Господа всем сердцем прославляху, мы же чтуще святую память вашу, святии мученицы, умильно взываем: Радуйтесь, неправедно гонимых заступницы. Радуйтесь, верных рабов Христовых друзи. Радуйтесь, сущих во узах и темницах хранителие. Радуйтесь, гонителей и обидящих вразумители. Радуйтесь, плачущих утешители. Радуйтесь, от наглыя и лютыя смерти избавители. Радуйтесь, Гурие, Самоне и Авиве, страстотерпцы Христовы и обидимых покровителие!

#### Кондак 6

С высоты мудрии благодать приемше, за сущих во искуплении предстоите, всехвальнии, темже отроковицу, святии, от смерти горькия избависте. Вы бо воистинну есте граду Эдесу слава и миру радость, сего ради воспеваем ко Господу: Аллилуиа

#### Икос 6

Вражия работы избави нас, Иисусе Жизнодавче, Твоих страдалец мольбами умоляем, яко да не порабощенну стяжав от страстей душу и тело, восхваляем тех скорейшую помощь, якоже во гробе затворенную мужем и сию скоро предваривше от смерти избавиша, темже взываем вам сице: Радуйтесь, невинную жену от лютыя смерти спасшии. Радуйтесь, дивным спасением ея зверства мучителя победившии. Радуйтесь, злаго мужа жестокое деяние обличившии.

Радуйтесь, и того веровати в силу Бога христианскаго научившии.

Радуйтесь, податели милости тоя требующим. Радуйтесь, стражи неусыпнии почитающих память вашу. Радуйтесь, Гурие, Самоне и Авиве, страстотерпцы Христовы и обидимых покровителие!

#### Кондак 7

Хотяй Человеколюбец Господь явити милость Свою людям Своим, сохрани телеса ваши нетленны, чудеса точащии, от них же вси вернии токи исцелений получают, зовуще Богу: Аллилуиа.

#### Икос 7

Новых заступников и дивных чудотворцев ведуще, людие из града Эдеса святой храм в память вашу создаша, в нем же и мощи ваша положиша, да вси страждущии помощь в них почерпают, мы же такожде тверду надежду на вас имуще, взываем вам сице:

Радуйтесь, душевных и телесных недугов наших целители. Радуйтесь, бесов о имени Господни изгонители. Радуйтесь, Евангельския истины “благодати” благовестители. Радуйтесь, Божественныя благодати носители. Радуйтесь, скорби многи за имя Господне приявшии. Радуйтесь, дивно во святых Его просиявшии. Радуйтесь, Гурие, Самоне и Авиве, страстотерпцы Христовы и обидимых покровителие!

#### Кондак 8

Странно и страшно неверным слышати, каковы дивные дела от святых мощей ваших совершаются: недузи врачуются, страсти исцеляются, мы же, твердо надежду на нас имуще, Богу о вас тако благодееющему с верою взываем: Аллилуиа.

#### Икос 8

Всеми добродетельми исполненнии, за нихже и славою Божию почтении, внимайте, святии мученицы, молитвам верных, чтущих святую память вашу, от нихже слышите сицевая:

Радуйтесь, нищии духом, яко ваше есть Царствие Небесное. Радуйтесь, плачущии, яко утешистесь. Радуйтесь, кротции, яко наследовасте землю. Радуйтесь, алкавшии и жаждавшии правды, яко насытитесь. Радуйтесь, милостивии, яко стяжали есте помилование. Радуйтесь, чистии сердцем, яко уже Бога узресте. Радуйтесь, Гурие, Самоне и Авиве, страстотерпцы Христовы и обидимых покровителие!

#### Кондак 9

Всякия напасти, находящия на град Эдес, разоряли есте, святии мученицы, темже и ныне не оставите нас смиренных и грешных, но вся люди страны нашия в православии и единомыслии утвердите, да вси едиными усты и единым сердцем воскликнем прославившему вас Господу: Аллилуиа.

#### Икос 9

Витии многовещаннии, яко рыбы безгласнии зрим о вас, святии мученицы: недоумеют бо, како в пустыни духом витали есте и посреде человек неусыпными подвиги подвижастесь. Мы же радуемися, яко таковы имамы учителя и молитвенники, прославляем вас, глаголюще:

Радуйтесь, кимвалы Слова Божия. Радуйтесь, теплии о нас пред Богом ходатаи. Радуйтесь, иудеев и еллинов просветители. Радуйтесь, тридневнаго Божества благовестители. Радуйтесь, кротости и воздержания учителя. Радуйтесь, лжи и татьбы обличителие. Радуйтесь, Гурие, Самоне и Авиве, страстотерпцы Христовы и обидимых покровителие!

#### Кондак 10

Спасти хотя люди града Эдеса от мысленнаго волка, твердо увещали есте тех стояти во истинней вере ниже козней вражиих устрашати, но и в скорбех и напастех за вас благодарити Бога, поюще Ему: Аллилуиа.

#### Икос 10

Стена тверда и надежнее прибежище есте, святии мученицы, всем к вам прибегающим и скорыя помощи требующим, сего ради во умилении сердца нашего взываем:

Радуйтесь, всех скорбящих радование. Радуйтесь, всех угнетенных и поработенных прибежище и освобождение. Радуйтесь, вдов и сирот заступление. Радуйтесь, от ересей и расколов ограждение. Радуйтесь, яко вси нечестивии житию вашему удивляются. Радуйтесь, яко вси благочестивии о имени вашем веселятся. Радуйтесь, Гурие, Самоне и Авиве, страстотерпцы Христовы и обидимых покровителие!

### Кондак 11

Пение благодарственное приносите ко Господу и о нас, теплии заступницы наши, молим вас присно не отступати от нас, грех наших ради, но милосердие от Господа всем испросите, вопиющим Ему: Аллилуиа.

### Икос 11

Светозарную троицу святых мучеников восхваляюще, вернии, устранимся распрей и раздоров в жизни сей, убежим несогласий и разделений в Православней вере и храняще единение духа в союзе мира, из глубины души воскликнем тако:

Радуйтесь, громогласныя трубы Евангельскаго благовестия. Радуйтесь, сладкозвучныя гусли проповеди спасения. Радуйтесь, крепции правды рачителие. Радуйтесь, непоколебимии неправды истребители. Радуйтесь, благочестивым семействам мира и блага податели. Радуйтесь, жестоким и неверным супругом строгие наказатели. Радуйтесь, Гурие, Самоне и Авиве, страстотерпцы Христовы и обидимых покровителие!

### Кондак 12

Благодать, данную вам от Бога, ведуще, память вашу празднуем, святые мученицы, с усердным молением к вашему честному образу притекающе, вашу твердою помощию, яко неборимую стеною ограждаем, сего ради восхваляем вас, страстотерпцы Христовы, и усердно зовем Богу: Аллилуиа.

### Икос 12

Поюще ваше дивное житие и мученическую кончину, молим вас, страстотерпцы Христовы Гурие, Самоне и Авиве, будете нам во всем благие помощницы, благословите нас миром и любовью, подайте нам твердую веру, чистоту жизни и страх Божий, да вси душевный покой имуще, в радости воскликнем: Радуйтесь, яко имена ваша и между неверными прославляются. Радуйтесь, покой и отрадо скорбящим, Радуйтесь, страх и удивление обидящим. Радуйтесь, невинную жену от лютыя смерти спасшии. Радуйтесь, злаго мужа ея достойно покаравшии. Радуйтесь, Гурие, Самоне и Авиве, страстотерпцы Христовы и обидимых покровителие!

### Кондак 13

О святии страстотерпцы Христовы Гурие, Самоне и Авиве,  
приимите сие наше хвалебное пение и, услышав усердно желание наше,  
избавите нас теплым своим к Богу предстательством, от всякаго зла,  
от вражды и несогласий и всяких лютых бед и болезней, да с любовью вас чтуще,  
выну зовем Богу: Аллилуиа, Аллилуиа, Аллилуиа.

*(Этот кондак читается трижды, затем икос 1 и кондак 1)*

### **Молитвы святым мученикам Гурию, Самону и Авиву**

#### Молитва первая

О святии мученицы и исповедницы Христовы Гурие, Самоне и Авиве! Теплии о нас ходатаи и молитвенницы пред Богом, во умилении сердец наших, взирая на пречистый ваш образ, смиренно молим вас: услышите нас, грешных и недостойных рабов своих, сущих в бедах, скорбех и напастех, и призрев наша тяжкая и бесчисленная прегрешения, явите нам свою великую милость, воздвигните нас из глубины греховныя, просветите наш ум, смягчите злое и окаянное сердце, прекратите зависть, вражду и раздоры, в нас живущие.

Осените нас миром, любовью и страхом Божиим, умолите милосерднаго Господа, да покрывает множество грехов наших Своим неизреченным милосердием.

Да соблюдет Церковь Свою святую от неверия, ересей и расколов. Да подаст стране нашей мир, благоденствие, земли плодородие; супругам любовь и согласие; чадам послушание; обидимым терпение; обидящим страх Божий; скорбящим благодушие; радующимся воздержание. Всех же нас да покрывает Своею всесильною десницею, и да избавит от глада, губительства, труса, потопа, огня, меча, нашествия иноплемеников и междоусобных брани, и напрасныя смерти.

Да оградит нас ополчением святых Своих Ангелов, во еже избавитися нам по исходе нашем из жития сего от козней лукаваго и тайных воздушных мытарств его, и не осужденными предстати Престолу Господа Славы, идеже лица святых Ангел со всеми святыми выну славят пресвятое и великолепное Имя Отца и Сына и Святаго Духа, ныне и присно и во веки веков. Аминь.

#### Молитва вторая

О преславнии мученицы Гурие, Самоне и Авиве! Защитите нас, раб Божиих (*имена*), от напастей злых человек и козней демонских: оградите нас от нечаянной смерти, избавите от огня, меча и всякаго душепагубнаго обстояния. Ей, страстотерпцы Христовы, устройте нам молитвами вашими вся благая и полезная, да благочестно житие временное прешедше и кончину непостыдну стяжавше, удостоимся теплым заступлением вашим со всеми святыми одесную Правосуднаго Бога Судии стати и Того непрестанно славити, со Отцем и Святым Духом, во веки веков.

#### Молитва третья

О, преславнии мученицы Гурие, Самоне и Авиве! К вам, яко скорым помощником и теплым молитвенником, мы немощнии и недостойнии прибегаем, усердно моляще: не презрите ны, во многая беззакония впадшия и по вся дни и часы согрешающия; наставите на путь правый заблудшия, исцелите страждущия и скорбящия; соблюдайте ны в непорочном и целомудренном житии; и якоже древле, тако и ныне покровителие супружеств пребудите, в любви и единомыслии сия утверждающе и от всех злых и бедственных обстояний избавляюще.

Защитите, о многомощнии исповедницы, вся православныя христианы от напастей, злых человек и козней демонских; оградите я от нечаянной смерти, умоляюще Всеблагаго Господа, да великия и богатая милости нам, смиренным рабом Своим, пробавит. Несмы бо достойни нечистыми устнами призывати великолепое имя Создателя нашего, аще не вы, святии мученицы, за ны ходатаи будете; сего ради к вам прибегаем и предстательства вашего пред Господем о нас просим.

Такожде избавите нас от глада, потопа, огня, меча, нашествия иноплемеников, междоусобных брани, смертоносных язвы и всякаго душепагубнаго обстояния. Ей, страстотерпцы Христовы, устройте нам молитвами вашими вся благая и полезная, да благочестно житие временное прешедше и кончину непостыдну стяжавше, удостоимся теплым заступлением вашим со всеми святыми одесную Правосуднаго Бога Судии стати и Того непрестанно славити со Отцем и Святым Духом во веки веков. Аминь.

#### ***Тропарь глас 5, мученикам Гурию, Самону и Авиву, исповедникам***

Чудеса святых Твоих мученик стену небориму,  
нам даровавый, Христе Боже, тех молитвами советы языков разори,  
Церковь святую укрепи, яко един Благ и Человеколюбец.